

ZAKON O OBRTU I SRODNIM DJELATNOSTIMA

NESLUŽBENI PREČIŠĆENI TEKST¹
(„Službene novine Federacije BiH“, broj: 35/09 i 42/11)²

POGLAVLJE I. – OPŠTE ODREDBE

Član 1.

(Sadržaj Zakona)

Ovim zakonom uređuju se uslovi, obavljanje obrtničke djelatnosti (u daljem tekstu: obrt) i srodnih djelatnosti, registracija, poslovanje, zajedničko obavljanje i prestanak obavljanja obrta i srodnih djelatnosti, obrazovanje i osposobljavanje za obavljanje obrta i srodnih djelatnosti, organizovanje obrtnika i lica koja obavljaju srodne djelatnosti i nadzor.

Član 2.

(Osnovne definicije)

(1) **Obrt**, u smislu ovog zakona, jeste samostalno i trajno obavljanje dopuštenih i registrovanih privrednih djelatnosti u osnovnom, dopunskom ili dodatnom zanimanju, od strane fizičkih lica sa svrhom postizanja dobiti koja se ostvaruje proizvodnjom, prometom ili pružanjem usluga na tržištu.

(2) **Srodne djelatnosti**, u smislu ovog zakona, jesu sve registrovane privredne i druge djelatnosti koje obavljaju fizička lica po pravilima obavljanja obrta, a koje se ne smatraju obrtom.

(3) U srodne djelatnosti ubrajaju se i poljoprivredne djelatnosti u smislu člana 3. Zakona o poljoprivredi ("Službene novine Federacije BiH", broj 88/07).

(4) Dopuštena je svaka privredna i druga djelatnost koja nije zakonom zabranjena i koja nije regulisana posebnim zakonom.

(5) Obrtnik i lice koje obavlja srodnu djelatnost, u smislu ovog zakona, jeste fizičko lice koje obavlja djelatnost u svoje ime i za svoj račun, a pritom se može koristiti i radom drugih lica sa kojima je u obavezi zaključiti ugovor o radu, u skladu sa Zakonom o radu i kolektivnim ugovorom.

(6) Gramatička terminologija korištenja muškog ili ženskog roda podrazumijeva uključivanje oba roda u ovom zakonu i propisima donesenim na osnovu ovog zakona.

Član 3.

(Ravnopravnost spolova)

Zabranjuje se svaki vid diskriminacije, nasilja na osnovu spola, uznemiravanja i seksualnog uznemiravanja na osnovu spola prilikom obavljanja, registracije, poslovanja, zajedničkog poslovanja i prestanka obavljanja obrta i srodnih djelatnosti, obrazovanja i osposobljavanja za obavljanje obrta i srodnih djelatnosti, organizovanja obrtnika i lica koja obavljaju srodne djelatnosti i nadzora na osnovu ovog zakona i propisa donesenih na osnovu ovog zakona.

¹ Legalist.ba objavljuje ovaj tekst u dobroj vjeri, smatrajući ga u trenutku objavljivanja ispravnom prečišćenom verzijom zakonskog teksta. Ali, autori i Legalist.ba ne jamče da je objavljena verzija prečišćenog teksta propisa pravno valjana, trenutno važeća ili pravodobno dopunjena i mijenjana, stoga Legalist.ba ne odgovara za štetne posljedice koje mogu nastupiti usljed preuzimanja i korištenja ovog neslužbenog prečišćenog teksta.

² Tekst koji je podvučen su izmjene objavljene u „Službenim novinama FBiH“ 42/11.

Član 4.

(Domaća radinost)

- (1) Domaćom radinosti smatraju se određeni obrti i srodne djelatnosti.
- (2) Domaća radinost, u smislu ovog zakona, jeste djelatnost izrade i dorade predmeta kod kojih preovlađuje ručni rad i usluge u domaćinstvu.
- (3) Djelatnost domaće radinosti obavlja se samostalno ili uz pomoć članova zajedničkog domaćinstva.
- (4) Obavljanje domaće radinosti upisuje se u Obrtni registar.
- (5) Popis djelatnosti koje se mogu obavljati kao domaća radinost i uslove za njihovo obavljanje propisuje federalni ministar razvoja, poduzetništva i obrta na prijedlog kantonalnih ministarstava nadležnih za oblast obrtništva.

Član 5.

(Sezonsko obavljanje djelatnosti)

- (1) Obrti i srodne djelatnosti se mogu obavljati i sezonski, najduže 9 (devet) mjeseci unutar jedne kalendarske godine.
- (2) Obrtnici i lica koja obavljaju srodnu djelatnost iz stava (1) ovoga člana, u vrijeme trajanja sezonskog obavljanja djelatnosti, uspostavljaju svojstvo osiguranika, ako nemaju već zasnovan radni odnos.
- (3) Sezonsko obavljanje obrta i srodne djelatnosti upisuje se u Obrtni registar.
- (4) Popis obrta i srodnih djelatnosti koje se mogu obavljati sezonski i uslove za njihovo obavljanje propisuje federalni ministar razvoja, poduzetništva i obrta na prijedlog kantonalnih ministarstava nadležnih za oblast obrtništva.

Član 6.

(Vezani i posebni obrti)

- (1) Obrti, u smislu ovog zakona, jesu: vezani i posebni.
- (2) Vezani obrti su obrti za čije se obavljanje traži odgovarajuća stručna sprema.
- (3) Posebni obrti su obrti koje obrtnik može obavljati samo ako ispunjava uslove za vezane obrte iz stava (2) ovog člana i ima saglasnost za obavljanje posebnih obrta.
- (4) Vezani obrt se može obavljati u stambenim prostorijama pod uslovima i za djelatnosti koje će propisati federalni ministar razvoja, poduzetništva i obrta na prijedlog kantonalnih ministarstava nadležnih za oblast obrtništva.
- (5) Vezane obrte koji se mogu obavljati izvan poslovnih i stambenih prostorija, te uslove za njihovo obavljanje propisat će federalni ministar razvoja, poduzetništva i obrta na prijedlog kantonalnih ministarstava nadležnih za oblast obrtništva.
- (6) Popis vezanih obrta po vrstama, stepen i vrstu stručne spreme potrebne za njihovo obavljanje, te popis posebnih obrta po vrstama, uslove i način izdavanja saglasnosti za obavljanje posebnog obrta propisuje Vlada Federacije BiH na prijedlog federalnog ministra razvoja, poduzetništva i obrta.

Član 7.

(Srodne djelatnosti)

- (1) Srodne djelatnosti, u smislu ovog zakona, jesu djelatnosti za čije se obavljanje traži odgovarajuća stručna sprema, ovisno o vrsti djelatnosti, propisana posebnim zakonom.
- (2) Iznimno, odredba iz stava (1) ovog člana ne primjenjuje se na obavljanje srodnih djelatnosti iz stava (3) član 2. ovog zakona.
- (3) Srodne djelatnosti za čije obavljanje je dovoljno izučavanje u roku ne dužem od 3 (tri) mjeseca i koje ne proizilaze iz nekog vezanog ili posebnog obrta mogu obavljati lica sa najmanje završenom osnovnom školom.

Član 8.
(Tradicionalni i stari zanati)

(1) Tradicionalni i stari zanati jesu obrti za koje je potrebno posebno poznavanje zanatskih vještina i umijeća u obavljanju djelatnosti i koji se obavljaju pretežnim udjelom ručnog rada.

(2) U cilju očuvanja tradicije Vlada Federacije Bosne i Hercegovine, na prijedlog federalnog ministra razvoja, poduzetništva i obrta, uz prethodno pribavljeno mišljenje jedinica lokalne samouprave, utvrdit će popis tradicionalnih i starih obrta koji se mogu obavljati pod uslovima određenim u stavu (2) člana 6. ovog Zakona.

(3) Za obavljanje djelatnosti tradicionalnih i starih obrta Vlada Federacije, Vlade kantona i jedinice lokalne samouprave propisat će odgovarajuće olakšice, svako iz svoje nadležnosti, koje će stimulirati očuvanje tradicionalnih i starih obrta i pojačati interes za njihovo obavljanje.

POGLAVLJE II. – OBAVLJANJE OBRTA

1. Uslovi za obavljanje obrta

Član 9.
(Opšti uslovi)

(1) Fizičko lice može obavljati obrt kao osnovno zanimanje ako ispunjava sljedeće opšte uslove:

- da je državljanin Bosne i Hercegovine,
- da je poslovno sposobno,
- da udovoljava opštim i posebnim zdravstvenim uslovima, ako je to propisano posebnim zakonom,
- da mu pravomoćnom sudskom presudom, rješenjem o prekršaju ili upravnim aktom nije izrečena zaštitna mjera zabrane obavljanja obrta dok ta mjera traje.

(2) Fizičko lice može obavljati obrt kao dopunsko ili dodatno zanimanje ako ispunjava uslove iz stava (1) ovog člana i ako ima već zasnovan radni odnos po bilo kom osnovu ili je korisnik penzije u skladu sa članom 11. st. (2) i (3) ovog zakona, ukoliko posebnim zakonom nije drugačije propisano.

Član 10.
(Posebni uslovi)

(1) Fizičko lice može obavljati vezani obrt ako uz opšte uslove iz člana 9. ovog zakona ispunjava i poseban uslov stručne spreme.

(2) Fizičko lice koje ispunjava opšte uslove iz člana 9. ovog zakona, a ne ispunjava poseban uslov stručne spreme može obavljati vezani obrt ako na tim poslovima uposli uposlenika koji udovoljava tom uslovu, što se utvrđuje rješenjem kojim se odobrava obavljanje obrta.

(3) Vezane obrte mogu obavljati i lica sa odgovarajućim višim ili visokim obrazovanjem u skladu sa odredbama člana 6. stav (2) ovog zakona.

(4) Kantonalni ministar nadležan za oblast obrazovanja po prethodno pribavljenom mišljenju kantonalne obrtničke komore i nadležnog kantonalnog ministarstva u spornim slučajevima određuje koje je to odgovarajuće više ili visoko obrazovanje iz stava (3) ovog člana.

(5) Vezani obrt može obavljati i fizičko lice - izumitelj na osnovu ostvarenog patentnog prava za patentirani proizvod ili uslugu ako ispunjava uslove iz člana 9. ovog zakona.

Član 11.
(Dopunsko zanimanje)

(1) Fizičko lice može obavljati obrt kao dopunsko zanimanje isključivo samostalnim radom i to najduže 20 sati sedmično, uz plaćanje poreza čiju visinu propisuje organ nadležan za poreze.

(2) Korisnik starosne penzije, koji je penziju ostvario sa 65 godina života ili sa 40 godina penzijskog staža, može istovremeno koristiti penziju i obavljati obrt kao dopunsko zanimanje. U tom slučaju vremensko ograničenje iz stava (1) ovog člana se ne primjenjuje.

(3) Odredbe iz stava (2) ovog člana odgovarajuće se primjenjuju i na korisnike penzije koji su svoja prava ostvarili u skladu sa propisima iz oblasti boračko – invalidske zaštite.

Član 12.
(Dodatno zanimanje)

Fizičko lice može obavljati obrt kao dodatno zanimanje isključivo putem uposlenika koji mora biti u radnom odnosu kod vlasnika obrta i ispunjavati uslove iz čl. 9. i 10. ovog zakona.

Član 13.
(Strani državljani)

(1) Strani državljanin može obavljati obrt ako ispunjava uslove iz člana 9. stav (1) alineja druga do četvrte i člana 10. st. (1) i (2) ovog zakona.

(2) Rješenje kojim se odobrava obavljanje obrta stranom državljaninu postaje pravno valjano izdavanjem radne dozvole u skladu sa Zakonom o zapošljavanju stranaca, i vrijedi za vremenski period za koji je ta dozvola izdata.

Član 14.
(Minimalni uslovi)

(1) Obrt se obavlja pod određenim uslovima u pogledu uređenja i opreme poslovnog prostora kao i pod drugim uslovima propisanim ovim zakonom i propisima donesenim na osnovu ovog zakona (u daljem tekstu: minimalni uslovi).

(2) Prostor i oprema za obavljanje obrta, osim uslova iz stava (1) ovog člana, moraju udovoljavati i propisima o tehničkoj opremljenosti, zaštiti na radu, zaštiti i unapređenju čovjekove okoline, zaštiti od buke, zdravstvenim i sanitarnim uslovima, te drugim propisima koji se odnose na obavljanje određene privredne djelatnosti.

(3) Ispunjenost uslova iz st. (1) i (2) ovog člana se pretpostavlja podnošenjem ovjerene pisane izjave od strane obrtnika o ispunjavanju uslova (pretpostavka ispunjavanja uslova).

(4) Ispunjenost uslova iz st. (1) i (2) ovog člana, u skladu sa zakonom koji uređuje oblast inspekcijskih poslova, utvrđuju nadležne inspekcije u redovnom inspekcijskom pregledu najkasnije 15 dana od dana upisa u Obrtni registar.

(5) Za štetu prouzrokovanu trećim licima koja je izazvana davanjem neistinite izjave iz stava (3) ovog člana, obrtnik odgovara cjelokupnom svojom imovinom.

(6) Za štetu prouzrokovanu trećim licima koja je izazvana davanjem neistinite izjave iz stava (3) ovog člana, dvoje ili više fizičkih lica koja, u skladu sa čl. 42. i 43. ovog zakona, zajednički obavljaju obrt, odgovaraju cjelokupnom svojom imovinom.

(7) Za štetu nastalu davanjem odobrenja u slučaju neispunjenosti uslova iz st. (1) i (2) ovog člana ili neispunjavanjem roka propisanog stavom (4) ovog člana odgovornost snose nadležne inspekcije.

(8) Federalni ministar razvoja, poduzetništva i obrta donijet će propis o minimalnim uslovima koje moraju ispunjavati poslovni prostori iz stava (1) ovog člana koji će sadržavati izgled i sadržaj obrasca izjave iz stava (3) ovog člana.

(9) Izjava obavezno sadrži: podatke o davaocu izjave, podatke o poslovnom prostoru i opremi, pobrojane minimalne tehničke uslove, tekst izjave o ispunjavanju minimalnih tehničkih uslova i posljedicama koje mogu nastupiti usljed davanja neistinite izjave.

2. Otvaranje obrta

Član 15.

(Nadležnost za provođenje Zakona)

Procedure utvrđene ovim zakonom vezane za: izdavanje obrtnice, tradicionalne i stare obrte, domaću radinost i sezonsko obavljanje djelatnosti, početak, privremeno obustavljanje, obavljanje obrta u vidu dopunskog ili dodatnog zanimanja, prestanak obavljanja obrta, kao i obavljanje obrta u izdvojenom prostoru provodi opštinski, odnosno gradski organ nadležan za oblast obrtništva (u daljem tekstu: nadležni organ).

Član 16.

(Rješenje za obavljanje obrta, obrtnica i saglasnost)

- (1) Za obavljanje vezanih i posebnih obrta, obrtnik mora imati obrtnicu, koja je, u smislu ovog zakona, odobrenje za rad.
- (2) Za obavljanje posebnih obrta obrtnik mora imati i saglasnost za obavljanje posebnih obrta.
- (3) Nadležni organ, na teritoriju na kojem će biti sjedište obrta donosi rješenje kojim se odobrava obavljanje obrta, ili rješenje kojim se zahtjev odbija, u skladu sa Zakonom o upravnom postupku, u roku od 15 dana od dana prijema urednog zahtjeva.
- (4) Rješenje kojim se odobrava obavljanje posebnog obrta postaje pravno valjano izdavanjem saglasnosti za obavljanje posebnog obrta.
- (5) O izdavanju saglasnosti iz stava (2) ovog člana stranka je dužna obavijestiti nadležni organ, koji to upisuje u Obrtni registar.
- (6) Po konačnosti rješenja iz st. (3) i (4) ovog člana, kojima se odobrava obavljanje obrta, odnosno posebnog obrta, nadležni organ vrši upis u Obrtni registar i obrtniku izdaje obrtnicu.
- (7) Obrtnica se izdaje u dvije veličine od kojih je veću obrtnik dužan izložiti u sjedištu obrta, na vidnom mjestu.
- (8) Saglasnost za obavljanje posebnih obrta izdaje nadležno ministarstvo ovisno o vrsti obrta u roku od 15 dana od dana prijema urednog zahtjeva.
- (9) Sadržaj i oblik obrtnice, kao i sadržaj i oblik saglasnosti za obavljanje posebnog obrta propisuje federalni ministar razvoja, poduzetništva i obrta.

Član 17.

(Obavljanje djelatnosti bez rješenja)

- (1) Ako u roku iz člana 16. stav (3) ovog zakona nadležni organ ne donese rješenje kojim se odobrava obavljanje obrta ili rješenje kojim se zahtjev odbija, obrtnik može, ako je podnio ovjerenu pisanu izjavu iz stava (3) člana 14. ovog zakona, započeti sa obavljanjem obrta, o čemu je dužan prethodno pisanim putem izvjestiti nadležni organ.
- (2) Nadležni organ iz stava (1) ovog člana, dužan je donijeti rješenje iz člana 16. stav (3) ovog zakona u roku od 30 dana od dana primljene obavijesti iz stava (1) ovog člana.
- (3) Ako nadležni organ iz stava (1) ovog člana utvrdi da su navodi izjave iz stava (3) člana 14. ovog zakona neistiniti, a obrtnik je započeo sa radom na osnovu stava (1) ovog člana, smatrat će se da se obrt obavlja protivno odredbama ovog zakona.

Član 18.

(Obrtni registar i Registar saglasnosti)

- (1) Obrt se upisuje u Obrtni registar koji vodi nadležni organ.

(2) Poljoprivredne djelatnosti iz stava (3) člana 2. ovog zakona upisuju se u Obrtni registar i u odgovarajuće registre propisane Zakonom o poljoprivredi.

(3) Registar saglasnosti za obavljanje posebnih obrta vodi ministarstvo nadležno za izdavanje saglasnosti za obavljanje posebnog obrta, ovisno o vrsti obrta.

(4) Oblik i način vođenja Obrtnog registra i Registra saglasnosti za obavljanje posebnih obrta, te mogućnosti njihova korištenja propisuje federalni ministar razvoja, poduzetništva i obrta.

Član 19. (Rok za početak rada)

(1) Obrtnik je dužan otpočeti s obavljanjem djelatnosti najkasnije u roku od 30 (trideset) dana od dana konačnosti rješenja o odobravanju obavljanja obrta.

(2) Od dana konačnosti rješenja iz stava (3) člana 16. ovog zakona obrtniku počinju teći prava i obaveze u skladu sa ovim zakonom i drugim propisima.

Član 20. (Dostavljanje rješenja)

Nadležni organ dužan je nakon upisa u Obrtni registar sva rješenja u vezi s obavljanjem obrta dostaviti: obrtniku, organu nadležnom za poreze, nadležnim inspekcijama, obrtničkoj komori kantona, nadležnom fondu zdravstvenog i penzijskog osiguranja, nadležnoj službi za zapošljavanje i Federalnom zavodu za statistiku.

Član 21. (Firma obrta)

(1) Firma je ime pod kojim posluje obrt.

(2) Firma sadrži naziv obrta, ime obrta, ime i prezime obrtnika i sjedište, a može sadržavati i posebne oznake.

(3) Firma ne može sadržavati nazive i oznake koje su u suprotnosti sa važećim propisima ili međunarodnim konvencijama.

(4) Na firmu obrta primjenjuju se odredbe Zakona o privrednim društvima, koje se odnose na firmu, ako ovim zakonom nije drugačije propisano.

(5) Promjenu naziva i oznake obrta, obrtnik je dužan prijaviti nadležnom organu koji o tome donosi rješenje.

(6) Obrtnik, odnosno uposlenik ili privremeni uposlenik dužan je istaknuti firmu na ulazu u sjedište obrta i izdvojene prostore u kojima se obavlja obrt.

Član 22. (Sjedište obrta)

(1) Sjedište obrta je mjesto naznačeno u obrtnici.

(2) Ako obrtnik mijenja sjedište obrta na teritoriju iste opštine ili na teritoriju druge opštine u istom kantonu dužan je podnijeti prijavu nadležnom organu na čijoj teritoriji će se nalaziti novo sjedište obrta, uz koju je obavezan priložiti obrtnicu.

(3) Ako obrtnik mijenja sjedište obrta na teritoriju iste opštine, po konačnosti rješenja o promjeni sjedišta, nadležni organ dužan je ovu promjenu unijeti u obrtnicu.

(4) Ako obrtnik mijenja sjedište obrta na teritoriju drugog kantona dužan je podnijeti prijavu nadležnom organu tog kantona, uz koju je obavezan priložiti obrtnicu.

(5) Nadležni organ koji je donio rješenje o promjeni sjedišta obrta dužan je, po konačnosti tog rješenja, izdati obrtniku novu obrtnicu sa novim brojem i novim sjedištem obrta i o tome obavijestiti nadležne organe iz člana 20. ovog zakona, kao i nadležni organ koji je prethodno izdao obrtnicu, ako se radi o promjeni sjedišta na teritoriju druge opštine ili drugog kantona.

3. Poslovanje obrta

Član 23.

(Djelatnosti obuhvaćene obrtnicom i saglasnošću)

- (1) Obrtnik može obavljati samo one obrte koji su obuhvaćeni obrtnicom, a u slučaju posebnih obrta samo one za koje je dobio saglasnost za obavljanje posebnih obrta.
- (2) Osim obrta iz stava (1) ovog člana obrtnik može obavljati i druge djelatnosti koje služe obavljanju djelatnosti koje su obuhvaćene obrtnicom ili se uobičajeno obavljaju uz djelatnost obuhvaćenu obrtnicom.
- (3) Za obavljanje djelatnosti iz stava (2) ovog člana ne mora se ispunjavati uslov stručne spreme.

Član 24.

(Prodaja proizvoda)

Obrtnici promet svojih proizvoda mogu obavljati u sjedištu registrovane djelatnosti i u izdvojenom poslovnom postoru.

Član 25.

(Izdvojeni prostori)

- (1) Obrt, kao osnovno ili dodatno zanimanje, se može obavljati u više izdvojenih prostora koji se nalaze u sjedištu ili izvan sjedišta obrta i koji moraju udovoljavati uslovima iz člana 14. ovog zakona.
- (2) Pod izdvojenim prostorom u smislu ovoga zakona podrazumijeva se jedan ili više međusobno odvojenih prostora u kojima se obavlja obrt ili koji služi za obavljanje obrta, a nalazi se u sjedištu ili izvan sjedišta obrta.

Član 26.

(Uposlenik u izdvojenom prostoru)

Obrtnici koji obavljaju vezane ili posebne obrte dužni su u svakom izdvojenom prostoru uposliti uposlenika koji mora biti u radnom odnosu kod obrtnika i ispunjavati uslove iz člana 9. i člana 10. stav (1) ovog zakona.

Član 27.

(Rješenje o izdvojenom prostoru)

- (1) Nadležni organ izdat će rješenje o obavljanju obrta, odnosno o prestanku obavljanja obrta u izdvojenom prostoru koje će, po konačnosti, upisati u evidenciju izdvojenih poslovnih prostora i izvijestiti nadležni organ u sjedištu obrta radi upisa u Obrtni registar.
- (2) Ukoliko se radi o obavljanju posebnog obrta, nadležni organ iz stava (1) ovog člana primjerak rješenja dostavit će ministarstvu koje je izdalo saglasnost za obavljanje posebnog obrta.

Član 28.

(Vođenje obrta putem uposlenika)

- (1) Obrtnik može vezani obrt voditi sam ili putem uposlenika koji mora biti u radnom odnosu kod obrtnika i ispunjavati uslove iz člana 9. i člana 10. stav (1) ovog zakona.
- (2) Obrtnik koji obavlja obrt u dodatnom zanimanju obrt vodi putem uposlenika koji mora biti u radnom odnosu kod obrtnika i ispunjavati uslove iz člana 9. i člana 10. stav (1) ovog zakona.
- (3) Uposlenik vodi obrt u ime i za račun obrtnika.
- (4) Vođenje obrta putem uposlenika obrtnik je dužan prijaviti nadležnom organu na teritoriju na kojem se nalazi sjedište obrta, koji rješenjem utvrđuje vođenje obrta putem uposlenika i upisuje to u Obrtni registar.

(5) Ako uposlenik postupi protivno odredbama ovog zakona, za štetu nastalu takvim djelovanjem, odgovara u skladu odredbama o naknadi štete ugovora iz stava (5) člana 2. ovog zakona.

Član 29.
(Članovi zajedničkog domaćinstva)

- (1) Članovi zajedničkog domaćinstva mogu u obavljanju obrta pomagati obrtniku.
- (2) Članovima zajedničkog domaćinstva, u smislu ovoga zakona smatraju se: bračni drug, djeca, roditelji, usvojenici i usvojitelji, pastorčad i lica koja je obrtnik dužan izdržavati.

Član 30.
(Odgovornost obrtnika)

- (1) Za obaveze koje nastanu u obavljanju obrta obrtnik odgovara cjelokupnom svojom imovinom.
- (2) Obrtnik odgovara za zakonitost obavljanja obrta i za zakonitost rada radnika koje zapošljava.

Član 31.
(Prenos obrtnice)

- (1) Obrtnica se ne može prenijeti na drugo lice, osim ako ovim zakonom nije drugačije propisano.
- (2) Posebni obrt se ne može prenijeti na drugo lice.

Član 32.
(Prenos obrtnice u slučaju smrti obrtnika)

- (1) Nakon smrti obrtnika, obrtnica se može prenijeti na njegove nasljednike, osim u slučaju iz člana 31. stav (2) ovog zakona.
- (2) Lica iz stava (1) ovog člana mogu nastaviti voditi obrt putem uposlenika koji mora ispunjavati uslove iz člana 9. i člana 10. stav (1) ovog zakona.
- (3) U slučaju iz stava (2) ovog člana nasljednici preuzimaju sve obaveze i odgovornosti iz člana 30. ovog zakona.

Član 33.
(Vođenje obrta nakon smrti obrtnika do prenosa obrtnice)

- (1) Nakon smrti obrtnika, supružnik, djeca i ostali nasljednici mogu nastaviti voditi obrt do prijenosa obrtnice u smislu člana 32. stav (1) ovog zakona, putem privremenog uposlenika, koji mora ispunjavati uslove iz člana 9. i člana 10. stav (1) ovog zakona.
- (2) Zahtjev za odobrenje za nastavak vođenja obrta putem privremenog uposlenika podnosi se nadležnom organu u roku od 30 (trideset) dana od dana smrti obrtnika.
- (3) Privremeni uposlenik se upisuje u Obrtni registar.
- (4) Privremeni uposlenik je dužan voditi obrt pažnjom dobrog privrednika za račun nasljednika umrlog obrtnika.
- (5) Ako privremeni uposlenik postupi protivno odredbama ovog zakona, za štetu nastalu takvim djelovanjem, odgovara u skladu odredbama o naknadi štete ugovora iz stava (5) člana 2. ovog zakona.

Član 34.
(Uslovi za prenos obrtnice nakon smrti obrtnika)

- (1) Ako nasljednici žele prenijeti obrtnicu na sebe nakon smrti obrtnika, te nastaviti voditi obrt putem uposlenika, dužni su to prijaviti nadležnom organu u roku od 30 (trideset) dana od dana okončanja ostavinskog postupka.
- (2) Uz prijavu iz stava (1) ovog člana mora se priložiti:

- izvod iz matične knjige umrlih za obrtnika,
- pravomoćna sudska odluka o nasljeđivanju,
- ime i prezime uposlenika, kao i dokaz da ispunjava uslove iz člana 9. i člana 10. stav (1) ovog zakona,
- izjavu nasljednika o saglasnosti vođenja obrta putem uposlenika.

(3) Nadležni organ iz stava (1) ovog člana donosi rješenje, te upisuje prenos obrtnice i nastavak vođenja obrta putem uposlenika u Obrtni registar.

Član 35.

(Prenos obrtnice u slučaju gubitka poslovne sposobnosti obrtnika)

(1) U slučaju djelimičnog ili potpunog gubitka poslovne sposobnosti obrtnika, obrtnica se može prenijeti na njegovog supružnika ili na djecu, osim u slučaju iz člana 31. stav (2) ovog zakona.

(2) Ukoliko obrtnik nema supružnika, odnosno djecu, obrtnica se može prenijeti na njegove roditelje, odnosno braću ili sestre.

(3) Lica iz st. (1) i (2) ovog člana mogu nastaviti vođenje obrta putem uposlenika koji mora ispunjavati uslove iz člana 9. i člana 10. stav (1) ovog zakona.

Član 36.

(Uslovi za prenos obrtnice u slučaju gubitka poslovne sposobnosti obrtnika)

(1) Lica iz člana 35. st. (1) i (2) ovog zakona ako žele prenijeti obrtnicu na sebe nakon djelimičnog ili potpunog gubitka poslovne sposobnosti obrtnika, te nastaviti voditi obrt putem uposlenika, dužni su to prijaviti nadležnom organu u roku od 30 (trideset) dana od dana pravosnažnosti sudske odluke o oduzimanju poslovne sposobnosti.

(2) Uz prijavu iz stava (1) ovog člana mora se priložiti:

- pravomoćna sudska odluka o oduzimanju poslovne sposobnosti obrtnika,
- ime i prezime uposlenika, kao i dokaz da ispunjava uslove iz člana 9. i člana 10. stav (1) ovog zakona.

(3) Nadležni organ iz stava (1) ovog člana donosi rješenje te upisuje prenos obrtnice i nastavak vođenja obrta putem uposlenika u Obrtni registar.

Član 37.

(Prenos obrtnice u slučaju kupoprodaje obrta)

(1) Obrtnica se može prenijeti na drugo lice u slučaju kupoprodaje obrta, osim u slučaju iz člana 31. stav (2) ovog zakona.

(2) Kupac obrta može nastaviti vođenje obrta sam, ako ispunjava uslove iz člana 9. i člana 10. stav (1) ovog zakona ili putem uposlenika koji mora biti u radnom odnosu kod kupca obrta i ispunjavati uslove iz člana 9. i člana 10. stav (1) ovog zakona.

Član 38.

(Uslovi za prenos obrtnice u slučaju kupoprodaje obrta)

(1) Kupac obrta iz člana 37. stav (2) ovog zakona dužan je podnijeti nadležnom organu zahtjev za prenos obrtnice u roku od 30 (trideset) dana od dana zaključivanja kupoprodajnog ugovora.

(2) Uz zahtjev iz stava (1) ovog člana mora se priložiti:

- ovjeren kupoprodajni ugovor;
- dokazi o ispunjavanju uslova iz člana 9. i člana 10. stav (1) ovog zakona, odnosno dokazi o ispunjavanju uslova iz člana 9. stav (1), alineja druga do četvrti i člana 10. stav (1) ovog zakona ako se radi o stranom državljaninu;
- ime i prezime uposlenika, kao i dokaz da ispunjava uslove iz člana 9. i člana 10. stav (1) ovog zakona, ako kupac nastavlja voditi obrt putem uposlenika;
- od strane kupca ovjerenu potpisanu izjavu iz člana 14. stav (3) ovog zakona;

- ovjerenu izjavu kupca da preuzima sve obaveze nastale u toku obavljanja obrta do trenutka kupovine istog.

(3) Nadležni organ iz stava (1) ovog člana donosi rješenje te upisuje prenos obrtnice i nastavak vođenja obrta putem uposlenika u Obrtni registar.

Član 39.

(Rokovi za prenos obrtnice)

Ako lica iz člana 32. stav (1), člana 35. st. (1) i (2) i člana 37. stav (1) ovog zakona propuste rok iz člana 33. stav (2), člana 34. stav (1), člana 36. stav (1) i člana 38. stav (1) ovog zakona gube pravo na prenos obrtnice i nastavak vođenja obrta, a obrt prestaje po sili zakona.

Član 40.

(Raspored radnog vremena)

(1) Raspored minimalnog dnevnog i sedmičnog radnog vremena obrtnika, kao i minimalno radno vrijeme obrtnika u dane državnih praznika i neradnih dana za pojedine obrte utvrđuje se propisom općinskog, odnosno gradskog vijeća.

(2) Općinsko, odnosno gradsko vijeće, za pojedine obrte, može propisati raspored početka i završetka dnevnog i sedmičnog radnog vremena.

Član 41.

(Dužnosti obrtnika, uposlenika i privremenog uposlenika)

Obrtnik, uposlenik ili privremeni uposlenik dužan je da:

- a) odobrenu djelatnost obavlja kvalitetno u skladu sa zakonima, propisima, dobrim poslovnim običajima i poslovnim moralom,
- b) na vidnom mjestu istakne cjenovnik svojih proizvoda odnosno usluga na način dostupan kupcima, odnosno korisnicima usluga i istih se pridržava,
- c) na vidnom mjestu istakne radno vrijeme i da ga se pridržava,
- d) kupcu odnosno korisniku usluga izda račun o prodatoj robi, odnosno izvršenim uslugama,
- e) garantuje kvalitet proizvoda odnosno usluga i otkloni nedostatke ili nadoknadi pričinjenu štetu kupcu proizvoda odnosno korisniku usluga u skladu sa važećim propisima i standardima,
- f) vodi uredno evidenciju o obavljanju djelatnosti u skladu sa posebnim zakonom i drugim propisima koje donosi Federalno ministarstvo finansija,
- g) provodi propisane mjere zaštite na radu i zaštite životne sredine koje se odnose na obavljanje registrovane djelatnosti.

4. Zajedničko obavljanje obrta

Član 42.

(Međusobni odnosi u zajedničkom obavljanju obrta)

(1) Dvoje ili više fizičkih lica mogu zajednički obavljati obrt.

(2) Međusobni odnosi i odgovornosti lica iz stava (1) ovog člana uređuju se pisanim ugovorom koji ugovorne strane dostavljaju nadležnom organu prilikom upisa u Obrtni registar.

(3) Na ugovor iz stava (2) ovog člana primjenjuju se propisi koji su utvrđeni Zakonom o obligacionim odnosima.

(4) Obrt iz stava (1) ovog člana posluje pod zajedničkom firmom.

Član 43.

(Uslovi za zajedničko obavljanje obrta)

- (1) Fizička lica mogu zajednički obavljati obrt ako ispunjavaju uslove iz člana 9. ovog zakona, te da najmanje jedno lice ispunjava i uslov iz člana 10. stav (1) ovog zakona.
- (2) Strani državljanin može obavljati zajednički obrt ukoliko ispunjava uslove iz člana 13. ovog zakona.
- (3) Odredbe ovoga zakona, kada obrt obavlja fizičko lice, odgovarajuće se primjenjuju i na obrt koji zajednički obavlja više fizičkih lica.
- (4) Zajedničko obavljanje obrta prestaje kada se broj osnivača svede na jednog i u tom slučaju može se izvršiti preregistracija u samostalno obavljanje obrta.

5. Prestanak obavljanja obrta

Član 44.

(Privremeno obustavljanje obavljanja obrta)

- (1) Obrtnik može privremeno obustaviti obavljanje obrta u trajanju do jedne godine, o čemu pisanim putem izvještava nadležni organ u roku od 7 (sedam) dana od dana obustave.
- (2) Iznimno, obrtnik može obustaviti obavljanje obrta duže od jedne godine, a najduže do tri godine, u slučaju bolesti ili nastupa više sile.
- (3) Iznimno, obrtnik može privremeno obustaviti obavljanje obrta u trajanju do tri godine kada koristi porodiljski dopust do navršene treće godine djetetova života.
- (4) Privremeno obustavljanje obavljanja obrta utvrđuje rješenjem nadležni organ.
- (5) Za vrijeme trajanja privremene obustave obavljanja obrta, obrtnik ne smije obavljati obrt i dužan je predati obrtnicu, veliku i malu, organu iz člana 16. stav (3) ovog zakona, uz pisanu obavijest iz stava (1) ovog člana.
- (6) O ponovnom početku obavljanja obrta obrtnik je dužan pisanim putem izvijestiti nadležni organ najkasnije u roku od 7 (sedam) dana po isteku vremena privremene obustave obrta.
- (7) Nadležni organ o privremenoj obustavi odnosno o ponovnom početku obavljanja obrta izvještava nadležne organe iz člana 20. ovog zakona.

Član 45.

(Prestanak obavljanja obrta odjavom)

- (1) Obrt prestaje odjavom ili po sili zakona.
- (2) Obrtnik je dužan odjaviti obavljanje obrta pisanim putem nadležnom organu prije prestanka rada.
- (3) Prestanak obrta utvrđuje rješenjem nadležni organ i po konačnosti rješenja briše obrt iz Obrtnog registra.
- (4) Prestanak obavljanja obrta odjavom utvrđuje se sa danom navedenim u odjavi, s tim da se obrt ne može odjaviti unatrag.
- (5) Ako u odjavi nije naznačen datum prestanka obavljanja obrta, prestanak se utvrđuje danom podnošenja zahtjeva za odjavu obavljanja obrta.

Član 46.

(Prestanak obavljanja obrta po sili zakona)

Obrt prestaje po sili zakona:

- a) ako obrtnik ne obavlja obrt kao dopunsku djelatnost u skladu sa članom 11. ovog zakona,
- b) ako obrtnik ne obavlja obrt kao dodatnu djelatnost u skladu sa članom 12. ovog zakona,
- c) smrću odnosno gubitkom poslovne sposobnosti obrtnika, ako se ne nastavi vođenje obrta od nasljednika, u skladu sa ovim zakonom,

- d) kupoprodajom obrta, ako se ne nastavi vođenje obrta od strane kupca u skladu sa ovim zakonom,
- e) ako obrtnik ne započne obavljati obrt u roku od 30 (trideset) dana od dana upisa u Obrtni registar,
- f) ako je pravomoćnim aktom obrtniku izrečena zaštitna mjera zabrane obavljanja obrta za vrijeme dok ta mjera traje,
- g) ako obrtnik protivno odredbi člana 44. stav (1) ovog zakona obustavi obavljanje obrta duže od 7 (sedam) dana,
- h) ako obrtnik ne započne sa obavljanjem obrta u roku od 30 (trideset) dana nakon isteka roka privremene obustave obavljanja obrta,
- i) danom stupanja na izdržavanje kazne ako bude osuđen pravomoćnom presudom na kaznu zatvora dužu od 6 (šest) mjeseci, ukoliko nije uposlio uposlenika u skladu sa članom 10. stav (2) i članom 28. ovog zakona,
- j) ako se utvrdi da obrtnik ne ispunjava uslove iz čl. 6., 9., 10., 11., 12., 13. i 14. stava (2) ovog Zakona,
- k) ako obrtnik izgubi državljanstvo Bosne i Hercegovine ili ako strancu prestane važiti radna dozvola,
- l) ako obrtnik ne uskladi poslovanje u roku iz člana 116. stav (1) ovog zakona,
- m) ako nadležni organ utvrdi da je obrtniku izdana obrtnica na osnovu lažnih isprava,
- n) promjenom prebivališta u slučaju da je kao sjedište obrta utvrđeno prebivalište obrtnika.

POGLAVLJE III. – OBAVLJANJE SRODNIH DJELATNOSTI

1. Uslovi za obavljanje srodnih djelatnosti

Član 47.

(Opšti i posebni uslovi za obavljanje srodnih djelatnosti)

- (1) Na uslove za obavljanje srodnih djelatnosti odgovarajuće se primjenjuju odredbe čl. 9., 11., 12., 13. i 14. ovog zakona.
- (2) Fizičko lice može obavljati srodne djelatnosti ako uz opšte uslove iz člana 9. ovog zakona ispunjava i uslov stručne spreme u skladu sa st. (1) i (3) člana 7. ovog zakona.
- (3) Fizičko lice može obavljati srodne djelatnosti iz stava (3) člana 2. ovog zakona ako ispunjava opšte uslove iz člana 9. ovog zakona.
- (4) Srodne djelatnosti se mogu obavljati u stambenim prostorijama pod uslovima i za djelatnosti koje će propisati federalni ministar razvoja, poduzetništva i obrta u okviru propisa iz stava (4) člana 6. ovog zakona.
- (5) Vrste srodnih djelatnosti, koje se mogu obavljati izvan poslovnih i stambenih prostorija, te uslove za njihovo obavljanje propisat će federalni ministar razvoja, poduzetništva i obrta u okviru propisa iz stava (5) člana 6. ovog zakona.

2. Otvaranje srodnih djelatnosti

Član 48.

(Odobrenje za obavljanje srodne djelatnosti)

- (1) Na otvaranje srodne djelatnosti odgovarajuće se primjenjuju odredbe čl. 15., 16., 17., 18., 19., 20., 21. i 22. ovog zakona.
- (2) Za obavljanje srodnih djelatnosti lice koje obavlja srodnu djelatnost mora imati odobrenje.
- (3) Odobrenje za obavljanje srodne djelatnosti fizičko lice koje obavlja tu djelatnost dužno je izložiti u sjedištu srodne djelatnosti, na vidnom mjestu.
- (4) Sadržaj i oblik odobrenja utvrđuje federalni ministar razvoja, poduzetništva i obrta u okviru propisa iz člana 16. stav (9) ovog zakona.

Član 49.

(Sjedište srodne djelatnosti)

Ako za obavljanje srodne djelatnosti nije potreban poslovni ili stambeni prostor, sjedište srodne djelatnosti je mjesto u kojem lice koje obavlja srodnu djelatnost ima prebivalište.

3. Poslovanje srodnih djelatnosti

Član 50.

(Primjena odgovarajućih odredbi)

(1) Na poslovanje srodne djelatnosti odgovarajuće se primjenjuju odredbe čl. 23., 24., 25., 27., 29., 30., 31., 32., 33., 34., 35. 36., 37., 38., 39., 40. i 41. ovog zakona.

(2) Na poslovanje srodne djelatnosti iz stava (3) član 2. ovog zakona odgovarajuće se primjenjuju odredbe čl. 23., 25., 29., 30., 31, 32., 33., 34., 35. 36., 37., 38., 39. i 41. ovog zakona.

Član 51.

(Obavljanje srodne djelatnosti u izdvojenom prostoru)

Lice koje obavlja srodnu djelatnost dužno je u svakom izdvojenom prostoru imenovati uposlenika koji mora biti u radnom odnosu kod vlasnika srodne djelatnosti i ispunjavati uslove iz čl. 7. i 9. ovog zakona.

Član 52.

(Obavljanje srodne djelatnosti putem uposlenika)

(1) Lice koje obavlja srodnu djelatnost može tu djelatnost voditi samo ili putem uposlenika, koje mora biti u radnom odnosu kod vlasnika srodne djelatnosti i ispunjavati uslove iz čl. 7. i 9. ovog zakona.

(2) Lice koje obavlja srodnu djelatnost u dodatnom zanimanju tu djelatnost vodi isključivo putem uposlenika, koji mora biti u radnom odnosu kod vlasnika srodne djelatnosti i ispunjavati uslove iz čl. 7. i 9. ovog zakona.

(3) Uposlenik vodi srodnu djelatnost u ime i za račun vlasnika srodne djelatnosti.

(4) Ako uposlenik postupi protivno odredbama ovog zakona, za štetu nastalu takvim djelovanjem, odgovara u skladu sa odredbama o naknadi štete ugovora iz stava 5. člana 2. ovog zakona.

4. Zajedničko obavljanje srodnih djelatnosti

Član 53.

(Primjena odgovarajućih odredbi)

Na zajedničko obavljanje srodnih djelatnosti odgovarajuće se primjenjuju odredbe čl. 42. i 43. ovog zakona.

5. Prestanak obavljanja srodnih djelatnosti

Član 54.

(Primjena odgovarajućih odredbi)

Na prestanak obavljanja srodnih djelatnosti odgovarajuće se primjenjuju odredbe čl. 44., 45. i 46. ovog zakona.

POGLAVLJE IV. – OBRAZOVANJE I OSPOSOBLJAVANJE ZA OBAVLJANJE OBRTA I SRODNIH DJELATNOSTI

Član 55. (Škole za obrazovanje)

Obrazovanje za obavljanje obrta i srodnih djelatnosti za koje se traži odgovarajuća školska sprema vrši se u osnovnim i odgovarajućim srednjim školama i visokoškolskim ustanovama.

Član 56. (Majstorski ispit)

(1) Obrazovanje za obavljanje vezanih obrta za koje je majstorski ispit predviđen kao daljnja kvalifikacija izvodi se prema programu kojeg donosi kantonalni ministar nadležan za obrazovanje na prijedlog srednje stručne škole i Obrtničke komore Federacije Bosne i Hercegovine.

(2) U izradi prijedloga programa Obrtnička komora Federacije Bosne i Hercegovine sudjeluje samo u formulisanju praktičnog dijela majstorskog ispita.

(3) Majstorskom ispitu mogu pristupiti lica, koja su završila odgovarajuću srednju stručnu školu i imaju najmanje dvije godine radnog iskustva u obrtu za koji žele polagati majstorski ispit, kao i lica sa neodgovarajućom srednjom školom i najmanje pet godina radnog iskustva u obrtu za koji žele polagati majstorski ispit.

Član 57. (Komisija za polaganje majstorskog ispita)

(1) Majstorski ispit polaže se pred komisijom koju osniva srednja stručna škola koja je verificirana za te poslove u skladu sa važećim propisima iz oblasti odgoja i obrazovanja, u saradnji sa obrtničkom komorom kantona. Komisija se sastoji od najmanje pet članova, a moraju biti zastupljena najmanje dva majstora obrta za koji se polaže majstorski ispit.

(2) Majstore u komisijama za polaganje majstorskog ispita imenuje obrtnička komora kantona.

(3) Nakon uspješno položenog majstorskog ispita majstoru se izdaje diploma o majstorskom zvanju.

(4) Srednja stručna škola koja je osnovala komisiju za polaganje majstorskog ispita vodi evidenciju o položenim majstorskim ispitima i dužna je dostaviti obrtničkoj komori kantona izvod iz evidencije o položenim majstorskim ispitima, u roku od 15 dana od dana polaganja majstorskog ispita.

(5) Sadržaj i oblik diplome iz stava (3) ovog člana propisuje federalni ministar razvoja, poduzetništva i obrta.

Član 58. (Troškovi ispita i nadzor provođenja ispita)

(1) Troškove majstorskog ispita snosi polaznik.

(2) Federalni ministar razvoja, poduzetništva i obrta, na prijedlog Obrtničke komore Federacije Bosne i Hercegovine, rješenjem utvrđuje cijenu polaganja majstorskih ispita.

(3) Nadzor nad zakonitošću organizovanja i provođenja majstorskih ispita provodit će Federalno ministarstvo razvoja, poduzetništva i obrta i kantonalno ministarstvo nadležno za obrazovanje.

Član 59. (Pravilnik o polaganju majstorskog ispita)

Pravilnik o polaganju majstorskog ispita donosi federalni ministar razvoja, poduzetništva i obrta.

POGLAVLJE V. – ORGANIZOVANJE OBRTRNIKA I LICA KOJA OBAVLJAJU SRODNE DJELATNOSTI

Član 60. (Sadržaj poglavlja)

Ovim poglavljem zakona uređuju se uslovi i način formiranja, ciljevi i poslovanje, registracija i nadzor svih oblika udruživanja obrtnika i lica koja obavljaju srodne djelatnosti.

Član 61. (Oblici udruživanja)

Oblici udruživanja obrtnika i lica koja obavljaju srodne djelatnosti jesu: udruženje obrtnika, udruženje lica koja obavljaju srodne djelatnosti, opšte udruženje, obrtnička komora kantona i Obrtnička komora Federacije Bosne i Hercegovine.

Član 62. (Članstvo)

(1) Obrtnici i lica koja obavljaju srodne djelatnosti danom upisa u Obrtni registar postaju članovi obrtničke komore kantona na čijem teritoriju se nalazi njihovo sjedište.

(2) Fizička lica iz stava (1) ovog člana obavezna su plaćati članarinu. Kontrolu naplate članarine vršit će nadležni poreski ured u skladu sa ovlaštenjima utvrđenim Zakonom o Poreznoj upravi Federacije Bosne i Hercegovine.

(3) Federalni ministar razvoja, poduzetništva i obrta po prethodno pribavljenom mišljenju Obrtničke komore Federacije Bosne i Hercegovine u spornim slučajevima određuje koje srodne djelatnosti potpadaju pod oblike udruživanja propisane ovim zakonom.

Član 63. (Pravilnik o visini i raspodjeli članarine)

Pravilnik o visini članarine, njenoj raspodjeli između udruženja obrtnika i udruženja lica koja obavljaju srodne djelatnosti, obrtničkih komora kantona i Obrtničke komore Federacije Bosne i Hercegovine i načinu uplate, donosi federalni ministar razvoja, poduzetništva i obrta na prijedlog Obrtničke komore Federacije Bosne i Hercegovine.

1. Udruženja obrtnika i udruženja lica koja obavljaju srodne djelatnosti

Član 64. (Udruženje obrtnika)

(1) Obrtnici koji obavljaju iste vezane obrte ili iste posebne obrte, propisane stavom (4) člana 6. ovog zakona, zbog unaprijeđivanja, usklađivanja i ostvarivanja zajedničkih interesa, na određenom području osnivaju udruženje obrtnika.

(2) Za svaki obrt na određenom području može biti osnovano samo jedno udruženje obrtnika i ono je ovlašteno da nosi oznaku u vezi sa obrtom za koji je osnovano.

(3) Područje koje obuhvata udruženje obrtnika pokriva područje jedne općine ili grada.

(4) Ukoliko na području jedne općine ili grada nema dovoljan broj obrtnika iz stava (1) ovog člana za formiranje udruženja, takvi obrtnici su članovi obrtničke komore kantona na čijem teritoriju se nalazi sjedište njihovog obrta i njihova članarina se uplaćuje toj komori.

(5) Udruženje obrtnika je pravno lice. Ono postaje pravno nadležno usvajanjem Statuta udruženja i registracijom u nadležnom kantonalnom organu, u skladu sa Zakonom o udruženjima i fondacijama ("Službene novine Federacije BiH", broj 45/02).

Član 65.
(Ciljevi udruženja obrtnika)

- (1) Cilj udruženja obrtnika je da unapređuje, usklađuje i ostvaruje zajedničke stručne interese svojih članova. Posebno treba da:
1. njeguje duh zajednice i poslovnu čast;
 2. uspostavi dobar odnos među majstorima i učenicima srednje stručne škole;
 3. podupire razvoj stručnih znanja majstora i za ovu svrhu može podržavati posebne stručne škole i održavati seminare;
 4. sarađuje, u skladu sa federalnim i kantonalnim propisima, sa upravom srednje stručne škole;
 5. unapređuje udruživanje u obrtništvu;
 6. daje mišljenja i obavještenja o okolnostima koje vladaju u obrtima koje predstavljaju;
 7. podržava obrtničke organizacije i ustanove u ispunjavanju njihovih zadataka;
 8. provodi propise i upute u okviru ovlasti prenesenih od obrtničke komore kantona;
- (2) Udruženje obrtnika treba da:
1. daje upute svojim članovima za poboljšavanje načina rada i vođenja obrtničke radnje u cilju povećavanja rentabilnosti i poboljšanja uslova rada u obrtničkoj radnji;
 2. podržava obrtničku štampu.
- (3) Udruženje obrtnika može:
1. osnovati fond uzajamne pomoći za svoje članove i pripadnike njihovih porodica u slučajevima bolesti, smrti, nesposobnosti za rad ili drugih potreba,
 2. provoditi i druge mjere za unapređivanje zajedničkih interesa članova udruženja.

Član 66.
(Statut udruženja obrtnika)

- (1) Ciljevi udruženja obrtnika, njegovo zastupanje i pravni odnosi njegovih članova regulisani su Statutom udruženja.
- (2) Statut mora sadržavati odredbe o:
1. imenu i sjedištu udruženja obrtnika, te području koje obuhvata, kao i obrte za koje je udruženje osnovano;
 2. zadacima udruženja obrtnika;
 3. prijemu, otpustu i isključivanju članova;
 4. pravima i obavezama članova;
 5. sazivanju Skupštine udruženja, pravu glasa i načinu odlučivanja;
 6. formiranju upravnih tijela;
 7. potvrđivanju rješenjem zaključaka Skupštine udruženja i upravnih tijela;
 8. donošenju plana budžeta, kao i izradi i podnošenju završnog godišnjeg računa;
 9. načinu izmjene Statuta i raspuštanja udruženja obrtnika, kao i načinu donošenja izmjena i ostalih akata;
 10. raspodjeli preostale imovine pri raspuštanju udruženja obrtnika;
 11. drugim odnosima i institutima neophodnim za rad udruženja.

Član 67.
(Saglasnost na Statut udruženja obrtnika)

- (1) Na Statut udruženja obrtnika saglasnost daje obrtnička komora kantona, na čijem području udruženje obrtnika ima sjedište.
- (2) Odobrenje se može uskratiti kada:
1. Statut ne odgovara zakonskim propisima;
 2. u Statutu predviđene granice područja udruženja obrtnika nisu u skladu sa odredbama člana 64. st. (2) i (3) ovog zakona.

Član 68.

(Fond uzajamne pomoći)

(1) Ako udruženje obrtnika formira fond predviđen članom 65. stav (3) tačka 1. ovog zakona, rad tog fonda definiše se posebnim opštim aktom. Saglasnost na taj opšti akt daje obrtnička komora kantona, na čijem području udruženje obrtnika ima sjedište.

(2) Prihodi i rashodi ovog fonda moraju se voditi na odvojenom računu i koristiti se u propisane svrhe, odvojeno od ostalih sredstava udruženja obrtnika. Sredstva odvojena u ovu svrhu ne smiju se upotrijebiti u druge svrhe.

Član 69.

(Članstvo udruženja obrtnika)

(1) Članom udruženja obrtnika može postati i pravno lice sa područja udruženja, koje obavlja djelatnost, stručno i privredno blisku obrtu za koji je udruženje obrtnika osnovano.

(2) Ako samostalni obrtnik obavlja više obrta, on se može učlaniti u sva udruženja obrtnika, osnovana za te obrte.

(3) Obrtniku ne može biti uskraćeno pravo učlanjenja u udruženje obrtnika, ako ispunjava uslove propisane ovim zakonom i Statutom.

(4) Udruženje obrtnika može primati gostujuće članove koji su obrtu, za koji je udruženje obrtnika osnovano, poslovno ili privredno bliski. Njihova prava i obaveze propisuju se Statutom.

Član 70.

(Organi upravljanja udruženja obrtnika)

Organi upravljanja u udruženju obrtnika su:

1. Skupština udruženja obrtnika;
2. Upravni i Nadzorni odbor (u daljem tekstu: upravna tijela)

Član 71.

(Skupština udruženja obrtnika)

(1) Skupština udruženja obrtnika odlučuje o svim poslovima udruženja obrtnika ukoliko te poslove ne obavljaju upravna tijela ili komisije. Skupština udruženja obrtnika se sastoji od članova udruženja obrtnika. Statutom se može propisati da Skupštinu udruženja obrtnika sačinjavaju predstavnici, izabrani od članova udruženja obrtnika iz njihove sredine, ako udruženje ima veliki broj članova.

(2) Posebne obaveze Skupštine su:

1. donošenje Statuta;
2. utvrđivanje budžeta i odobravanje izdataka koji nisu predviđeni budžetom;
3. utvrđivanje taksu koje se mogu naplatiti i od nečlanova udruženja obrtnika koji potražuju poslove ili usluge od udruženja obrtnika;
4. provjeravanje i prihvatanje završnog godišnjeg računa;
5. izbor predsjednika i pojedinih članova komisija, u broju koji se bira od članova udruženja;
6. osnivanje posebnih komisija za pripremu pojedinačnih zadataka;
7. donošenje rješenja o:
 - sticanju, otuđivanju ili stvarnom zaduživanju osnovne imovine;
 - otuđivanju predmeta koji imaju istorijsku, naučnu ili umjetničku vrijednost;
 - odobravanju podizanja kredita;
 - zaključivanju ugovora, kojima se obavljaju predviđene obaveze udruženja obrtnika, osim tekućih administrativnih poslova;
 - investiranju imovine udruženja obrtnika.
8. donošenje odluke o izmjenama Statuta;
9. donošenje odluke o gašenju udruženja obrtnika;

(3) Odluke navedene u stavu (2) tač. 7. i 8. zahtijevaju saglasnost obrtničke komore kantona.

Član 72.

(Pravilnik o izbornoj proceduri u udruženju)

(1) Pravilnik o izbornoj proceduri u udruženjima obrtnika donosi Obrtnička komora Federacije Bosne i Hercegovine.

(2) Poslovnik o radu Skupštine udruženja donosi Skupština.

(3) Skupština udruženja obrtnika saziva se prema odredbama Statuta, ako to zahtijevaju interesi udruženja obrtnika. Skupština se nadalje saziva i ako sazivanje pismeno zatraži najmanje desetina članova uz navođenje razloga i svrhe sazivanja.

(4) Ako se ne udovolji zahtjevu ili interesi udruženja obrtnika to zahtijevaju, obrtnička komora kantona može sazvati i voditi Skupštinu udruženja obrtnika.

Član 73.

(Pravo glasa)

(1) Pravo glasa u Skupštini udruženja obrtnika imaju članovi udruženja obrtnika u smislu člana 10. stav (1) ovog zakona. Pravnom licu može biti dat samo jedan glas i kada je prisutno više njegovih ovlaštenih predstavnika.

(2) Član udruženja obrtnika nema pravo glasa, ako je prije donošenja odluka pokrenut ili se vodi pravni spor između njega i udruženja obrtnika.

Član 74.

(Prenos prava glasa)

(1) U skladu sa članom 73., član sa pravom glasa, koji je, u smislu člana 2. ovog zakona, vlasnik obrtničke radnje, može prenijeti svoje pravo glasa na uposlenika obrtničke radnje, ukoliko on tu obavezu preuzme, kada je davalac punomoći u nadležnosti udruženja obrtnika.

(2) Statutom se može propisati mogućnost prenošenja prava iz stava (1) i u drugim izuzetnim slučajevima pod propisanim uslovima.

(3) Prenošnje i preuzimanje prava zahtijeva pismenu izjavu vlasnika obrta.

Član 75.

(Upravna tijela udruženja, Upravni i nadzorni odbor)

(1) Upravni odbor udruženja:

1. provodi odluke i zaključke Skupštine,
2. utvrđuje prijedlog Statuta i drugih akata koje donosi Skupština,
3. predlaže odluke i stavove, te daje mišljenje o pitanjima o kojima raspravlja Skupština,
4. odlučuje o prigovorima na pojedinačne akte donesene u obavljanju javnih ovlasti.

(2) Nadzorni odbor nadzire provođenje Statuta i drugih općih akata udruženja, materijalno – finansijsko poslovanje i raspolaganje sredstvima, te obavlja i druge poslove predviđene Statutom.

(3) Upravna tijela udruženja obrtnika, na period propisan Statutom, tajnim glasanjem bira Skupština udruženja obrtnika putem glasačkih listića. Izbor aklamacijom dopušten je ako niko nije uložio prigovor na takav način izbora. O postupku glasanja se vodi zapisnik. Rezultati izbora za upravna tijela udruženja obrtnika moraju se objaviti u toku trajanja Skupštine.

(4) Statutom se može propisati da se imenovanje upravnih tijela u svakom trenutku može opozvati. Statut, također, može propisati da je opoziv dopušten samo ako postoji važan razlog. Takav razlog je naročito gruba povreda preuzetih obaveza ili nesposobnost.

(5) Upravna tijela zastupaju udruženje obrtnika sudski i vansudski. Statutom zastupanje može biti preneseno na jednog ili više članova upravnih tijela ili na sekretara. Kao dokaz, kod svih pravnih poslova, dovoljna je potvrda obrtničke komore kantona na kojoj je naznačeno da je to lice član upravnih tijela udruženja obrtnika.

(6) Članovi upravnih tijela obavljaju službu besplatno, kao počasno zvanje. Statutom se može detaljnije propisati nadoknada nastalih troškova i obeštećenje za izgubljeno vrijeme.

Član 76. (Komisije)

Udruženje obrtnika može formirati komisije za rješavanje pojedinačnih poslova.

Član 77. (Obeštećenje trećih lica)

Udruženje obrtnika je odgovorno, propisanim postupkom, obeštetiti treća lica, za štetu koju počine upravna tijela, članovi upravnih tijela ili neki drugi, u skladu sa Statutom, imenovani zastupnici, u obavljanju povjerenih im funkcija.

Član 78. (Kordinacija rada udruženja)

Koordinaciju rada udruženja obrtnika vrši obrtnička komora kantona na čijem području udruženja obrtnika imaju sjedište. Koordinacija se odnosi na ispunjavnje odredbi zakona i Statuta, a naročito na potpuno obavljanje povjerenih im zadataka.

Član 79. (Gašenje udruženja)

Obrtnička komora kantona kod nadležnog kantonalnog organa pokreće postupak gašenja udruženje obrtnika:

1. ako je ugrožen zajednički interes zbog nezakonitih odluka članova ili nezakonitog ponašanja upravnih tijela;
2. ako teži ciljevima koji su u suprotnosti sa zakonom ili Statutom;
3. ako je ugroženo ispunjavanje zakonom i Statutom propisanih zadataka zbog velikog smanjenja broja članova.

Član 80. (Imovina udruženja)

(1) U skladu sa zakonom, gašenje udruženja obrtnika inicira pokretanje stečajnog postupka nad imovinom udruženja obrtnika.

(2) Upravna tijela, u slučaju nesolventnosti ili prezaduženosti, pokreću zahtjev za otvaranje stečajnog postupka ili postupka sudskog poravnjenja. Ako se kasni sa zahtjevom, članovi upravnih tijela, na čiji teret dug pada, odgovorni su povjeriocu za nastalu štetu i oni se vode kao ukupni dužnici.

(3) Ako se, odlukom Skupštine ili obrtničke komore kantona, udruženje obrtnika gasi, imovina udruženja obrtnika likvidira se uz odgovarajuću primjenu važećih zakonskih propisa.

Član 81. (Ravnopravnost spolova)

Prilikom formiranja Skupštine udruženja obrtnika, Upravnog i Nadzorog odbora i drugih organa i tijela odlučivanja i komisija, članstvo u organima, tijelima i komisijama odražavaće ravnopravnu zastupljenost spolova.

Član 82.

(Udruženje lica koja obavljaju srodne djelatnosti)

Na udruženja lica koja obavljaju srodne djelatnosti odgovarajuće se primjenjuju odredbe čl. 64. do 81. ovog zakona.

2. Opšta udruženja

Član 83.

(Opšte udruženje)

(1) Obrtnici i lica koja obavljaju srodne djelatnosti sa područja jedne opštine ili grada, zbog unaprijeđivanja, usklađivanja i ostvarivanja zajedničkih interesa, mogu osnovati opšte udruženje.

(2) Obrtnici i lica koja obavljaju srodne djelatnosti sa područja jedne opštine ili grada mogu osnovati opšte udruženje i u slučaju kada na području jedne opštine ili grada nema dovoljan broj obrtnika i lica koja obavljaju srodne djelatnosti za formiranje pojedinačnih udruženja.

(3) U slučaju iz stava (2) ovog člana svi obrtnici i lica koja obavljaju srodne djelatnosti su članovi opšteg udruženja na čijem teritoriju se nalazi sjedište njihovog obrta ili srodne djelatnosti.

(4) Ako opšte udruženje formiraju udruženja obrtnika i udruženja lica koja obavljaju srodne djelatnosti, ono se finansira sredstvima udruženja koja ga formiraju, u omjeru koji usvoji Skupština opšteg udruženja.

(5) Na opšte udruženje odgovarajuće se primjenjuju odredbe čl. 64. do 81. ovog zakona.

3. Obrtničke komore kantona

Član 84.

(Obrtnička komora kantona)

(1) Obrtničke komore kantona osnivaju se u cilju zastupanja interesa svih obrtnika i lica koja obavljaju srodne djelatnosti na području jednog kantona.

(2) Obrtnička komora kantona je pravno lice. Ona postaje pravno nadležna usvajanjem Statuta obrtničke komore kantona i registracijom kod nadležnog suda.

(3) Obrtnici i lica koja obavljaju srodne djelatnosti na području kantona danom upisa u Obrtni registar postaju članovi obrtničke komore kantona.

(4) Članom obrtničke komore kantona mogu postati trgovačka i privredna društva i druga pravna lica, osnovana po drugim zakonima.

Član 85.

(Ciljevi obrtničke komore kantona)

Cilj obrtničke komore kantona je da:

1. unapređuje obrt i srodne djelatnosti;
2. podupire interese članova obrtničke komore kantona i brine se o pravednom izjednačavanju njihovih interesa i interesa njihovih udruženja;
3. zastupa interese svojih članova pred tijelima kantonalne vlasti i tijelima kantonalne državne uprave;
4. daje primjedbe i prijedloge tijelima kantonalne vlasti i tijelima kantonalne državne uprave pri donošenju propisa od interesa za svoje članove;
5. obavlja poslove iz područja obrazovanja i osposobljavanja za potrebe obrtništva propisane ovim zakonom;
6. osniva Sud časti;
7. osniva Arbitražno vijeće;
8. vodi evidenciju članstva obrtničke komore kantona;
9. vodi evidenciju udruženja na svom području;
10. podstiče udruživanje u smislu čl. 64., 82. i 83. ovog zakona i koordinira, pomaže i prati provođenje osnovnih programskih zadataka u udruženjima;

11. podstiče, razvija i štiti dobre poslovne običaje, poslovni moral i zaštitu potrošača;
12. pruža pomoć svojim članovima prilikom osnivanja i obavljanja djelatnosti;
13. izdaje potvrde o porijeklu proizvoda izrađenih u pogonima svojih članova i druge potvrde koje služe privrednom prometu, ako za te poslova nisu zadužene neke druge, zakonom propisane, ustanove.
14. obavlja i druge poslove utvrđene ovim zakonom i Statutom.

Član 86.

(Statut obrtničke komore kantona)

- (1) Statut mora sadržavati odredbe o:
1. imenu, sjedištu i području obrtničke komore kantona;
 2. pečatu i žigu obrtničke komore kantona;
 3. broju članova obrtničke komore kantona i broju predstavnika;
 4. raspodjeli broja članova i predstavnika na zastupljene djelatnosti na području obrtničke komore kantona;
 5. izboru upravnih tijela i njihovim ovlaštenjima;
 6. sazivanju Skupštine obrtničke komore kantona i njenih tijela;
 7. formi rješenja i dokumentovanja odluka obrtničke komore kantona i upravnih tijela;
 8. izradi srednjoročnog finansijskog plana i njegovoj prezentaciji na Skupštini;
 9. predlaganju i odobravanju budžeta;
 10. izradi, kontroli i prihvatanju završnog godišnjeg računa, i prenošenju ovlasti za kontrolu tog računa na nezavisnu instituciju, izvan obrtničke komore kantona;
 11. pretpostavkama i formi izmjene Statuta;
 12. službenim novinama u kojima se objavljuju saopštenja obrtničke komore kantona.
- (2) Statut ne smije sadržavati odredbe, koje nisu u skladu sa zadacima obrtničke komore kantona propisanim ovim zakonom ili su u protivriječnosti sa zakonskim propisima.
- (3) Statut urađen u skladu sa stavom 1. objavljuje se u službenim novinama nadležnim za sjedište obrtničke komore kantona.

Član 87.

(Saglasnost na Statut obrtničke komore kantona)

Saglasnost na Statut obrtničke komore kantona daje Vlada kantona. O izmjenama Statuta odlučuje Skupština obrtničke komore. Odluka o izmjenama Statuta zahtijeva saglasnost Vlade kantona.

Član 88.

(Organi upravljanja obrtničke komore kantona)

Organi upravljanja u obrtničkoj komori kantona su:

1. Skupština,
2. Upravni i Nadzorni odbor (u daljem tekstu: upravna tijela)

Član 89.

(Skupština obrtničke komore kantona)

- (1) Skupština zadržava za sebe pravo donošenja odluka o:
1. donošenju Statuta;
 2. izboru upravnih tijela i komisija
 3. utvrđivanju budžeta uključujući plan raspodjele, odobravanju izdataka koji nisu predviđeni budžetom, ovlaštenjima za podizanje kredita i stvarnim opterećenjima nepokretne imovine;
 4. prijedlogu iznosa članarine čiju visinu utvrđuje Obrtnička komora Federacije BiH;
 5. donošenju propisa o raspolaganju budžetom, kasom i računom;

6. kontroli i prihvatanju završnog godišnjeg računa i odluci o tome koja nezavisna institucija treba izvršiti kontrolu završnog godišnjeg računa;
7. sticanju i prodaji nepokretne imovine;
8. donošenju propisa o stručnom obrazovanju, stručnom usavršavanju u obrazovanju i prekvalifikaciji (član 85. stav (1) tačka 5.);
9. izmjenama Statuta.

(2) Odluke donesene u skladu sa stavom (1) tač. 3., 5., 6., 7. i 9., objavljuju se u službenim novinama nadležnim za obrtničku komoru kantona (član 86. stav (1) tačka 12.).

Član 90.

(Sastav Skupštine obrtničke komore kantona)

- (1) Skupština se sastoji od izabranih članova.
- (2) Statutom se propisuje broj članova Skupštine i njihova raspodjela na udruženja koja se nalaze na teritoriji obrtničke komore kantona. Pri raspodjeli se mora voditi računa o privrednim specifičnostima i privrednom značaju pojedinih djelatnosti.

Član 91.

(Izborni postupak u Skupštini obrtničke komore kantona)

- (1) Članovi Skupštine i njihovi zamjenici biraju se tajnim glasanjem, putem glasačkih listića, na zajedničkim, neposrednim i istim izborima.
- (2) Pravo izbora za člana Skupštine imaju fizička lica koja su upisana u Obrtni registar. Pravna lica, u smislu člana 84. stav (4), imaju pravo na samo jedan glas.
- (3) Izborni postupak provodi se prema Pravilniku o izbornoj proceduri u obrtničkim komorama kantona i Obrtničkoj komori Federacije BiH koji će donijeti federalni ministar razvoja, poduzetništva i obrta.

Član 92.

(Predsjednik i potpredsjednici)

- (1) Obrtnička komora kantona ima predsjednika i dva potpredsjednika Skupštine i predsjednika i dva potpredsjednika obrtničke komore kantona.
- (2) Predsjednici i potpredsjednici iz stava (1) ovog člana biraju se po mogućnosti iz reda različitih konstitutivnih naroda i te funkcije mogu obavljati u najviše 2 (dva) mandata.
- (3) Predsjednik i potpredsjednici vrše svoje funkcije u međusobnoj koordinaciji.
- (4) Predsjednik obrtničke komore kantona predstavlja i zastupa obrtničku komoru kantona.

Član 93.

(Sud časti)

- (1) U okviru obrtničke komore kantona djeluje Sud časti.
- (2) Sud časti vodi postupke i odlučuje o povredama poslovnih običaja, ugovora, tržišnih pravila i drugih propisa.
- (3) O žalbama protiv odluka Suda časti obrtničke komore kantona rješava Sud časti Obrtničke komore Federacije Bosne i Hercegovine.
- (4) Statutom i drugim opštim aktima obrtničkih komora kantona utvrđuje se organizacija, sastav, način izbora, mjere koje može izreći, postupak i druga pitanja rada Sudova časti.

Član 94.

(Koordiniranje rada obrtničkih komora kantona)

Obrtnička komora Federacije Bosne i Hercegovine koordinira rad obrtničkih komora kantona. Koordinacija se odnosi na zakonitost rada, donošenje akata i njihovu primjenu.

Član 95.

(Primjena odgovarajućih odredbi)

Na obrtničke komore kantona odredbe čl. 68., 69., 73., 74., 75., 76., 77. i 81. ovog zakona odgovarajuće se primjenjuju.

4. Obrtnička komora Federacije Bosne i Hercegovine

Član 96.

(Obrtnička komora Federacije BiH)

(1) Obrtnička komora Federacije Bosne i Hercegovine (u daljem tekstu: Komora) je samostalna, stručno – poslovna organizacija obrtnika i lica koja obavljaju srodne djelatnosti koja se osniva radi usklađivanja i zastupanja zajedničkih interesa članova Komore.

(2) Komora predstavlja i zastupa obrtnike i lica koja obavljaju srodne djelatnosti pred federalnim i drugim tijelima u zemlji i inostranstvu.

(3) Komora je pravno lice. Ona postaje pravno nadležna usvajanjem Statuta Komore i registracijom kod nadležnog suda.

Član 97.

(Članstvo Komore)

(1) Obrtnici i lica koja obavljaju srodne djelatnosti na teritoriji Federacije Bosne i Hercegovine, u skladu sa ovim zakonom, su članovi Komore putem obrtničkih komora kantona.

(2) Članom Komore mogu postati trgovačka i privredna društva i druga pravna lica, osnovana po drugim zakonima.

(3) Članstvo u Komori prestaje za članove iz stava (1) ovog člana danom brisanja iz Obrtnog registra, a za članove iz stava (2) ovog člana na osnovu odluke nadležnog tijela Komore.

(4) Evidencija članova Komore je javna knjiga, na osnovu koje se izdaju odgovarajuća uvjerenja kao javne isprave.

Član 98.

(Ciljevi Komore)

Komora u skladu sa ovim zakonom:

1. unapređuje obrt i srodne djelatnosti;
2. razvija obrtničke komore kantona u okviru poslova i zadataka utvrđenih ovim zakonom i Statutom Komore;
3. zastupa interese svojih članova pred tijelima federalne vlasti i tijelima federalne državne uprave;
4. daje primjedbe i prijedloge tijelima federalne vlasti i tijelima federalne državne uprave pri donošenju propisa od interesa za svoje članove;
5. obavlja poslove iz područja obrazovanja i osposobljavanja za potrebe obrtništva propisane ovim zakonom;
6. podstiče i sudjeluje u izdavačkoj djelatnosti za potrebe svojih članova;
7. osniva Sud časti;
8. osniva Arbitražno vijeće;
9. vodi evidenciju članstva Komore;
10. vodi evidenciju obrtničkih komora kantona;
11. podstiče, koordinira, pomaže i prati provođenje osnovnih programskih zadataka u udruženjima i obrtničkim komorama kantona;
12. donosi propis o izornoj proceduri u udruženjima obrtnika i udruženjima lica koja obavljaju srodne djelatnosti;
13. procjenjuje mogućnosti i uslove privrednog razvoja, te podstiče istraživanja u privredi od interesa za svoje članove;

14. uspostavlja i razvija sve vrste poslovnih odnosa na domaćem i inostranom tržištu;
15. podstiče inovacije postupaka, proizvoda i usluga, kao i razvoj tehnološke infrastrukture;
16. podstiče, razvija i štiti dobre poslovne običaje, poslovni moral i zaštitu potrošača;
17. pruža pomoć svojim članovima prilikom osnivanja i obavljanja djelatnosti;
18. razvija informacioni sistem i poslovno informisanje, te informiše članstvo o stručnim, poslovnim i tehnološkim pitanjima i novostima iz djelokruga rada Komore putem komorskog časopisa i drugih sredstava javnog informisanja;
19. obavlja i druge poslove utvrđene ovim zakonom i Statutom.

Član 99. (Statut Komore)

(1) Statut mora sadržavati odredbe o:

1. imenu i sjedištu Komore;
2. pečatu i žigu Komore;
3. javnim ovlastima Komore;
4. broju predstavnika obrtničkih komora kantona u skupštini Komore;
5. zadacima i poslovima Komore;
6. pravima, obavezama i odgovornostima članova Komore;
7. saradnji sa tijelima federalne vlasti i tijelima federalne državne uprave;
8. saradnji sa komorama u zemlji i inostranstvu i sa međunarodnim organizacijama;
9. izboru upravnih tijela Komore i njihovim ovlaštenjima;
10. strukovnim savjetima Komore;
11. sazivanju Skupštine Komore i njenih tijela;
12. formi rješenja i dokumentovanja odluka Komore i upravnih tijela;
13. izradi srednjoročnog finansijskog plana i njegovoj prezentaciji na Skupštini;
14. predlaganju i odobravanju budžeta;
15. izradi, kontroli i prihvatanju završnog godišnjeg računa, i prenošenju ovlasti za kontrolu tog računa na nezavisnu instituciju, izvan Komore;
16. pretpostavkama i formi izmjene Statuta;
17. službenim novinama u kojima se objavljuju saopštenja Komore.

(2) Statut ne smije sadržavati odredbe, koje nisu u skladu sa zadacima Komore propisanim ovim zakonom ili su u protivriječnosti sa zakonskim propisima.

(3) Statut urađen u skladu sa stavom (1) objavljuje se u Službenim novinama Federacije BiH.

Član 100. (Saglasnost na Statut Komore)

Saglasnost na Statut Komore daje Vlada Federacije BiH. Odluka o izmjenama i dopunama Statuta zahtijeva saglasnost Vlade Federacije BiH.

Član 101. (Organi upravljanja Komore)

Organi upravljanja u Komori su:

1. Skupština,
2. Upravni i Nadzorni odbor (u daljem tekstu: upravna tijela)

Član 102. (Skupština Komore)

(1) Skupština Komore:

1. donosi:

- Statut i izmjene i dopune Statuta,
- Poslovnik o radu Skupštine,
- program rada i finansijski budžet, uključujući plan raspodjele, odobravanje izdataka koji nisu predviđeni budžetom, ovlaštenja za podizanje kredita i stvarna opterećenja nepokretne imovine,
- odluku o visini i raspodjeli članarine,
- propise o raspolaganju budžetom, kasom i računom,
- propis o sticanju i prodaji nepokretne imovine,
- odluku o raspisivanju i provođenju izbora predstavnika Komore,
- pravilnik o organizaciji, sastavu, načinu izbora i nadležnosti Suda časti, te o postupku i mjerama koje on može izreći,
- pravila o dobrim poslovnim običajima za određena zanimanja,
- ostale akte koji nisu u nadležnosti upravnih tijela Komore.

2. utvrđuje:

- jedinstvenu politiku finansiranja ukupnog komorskog sistema,
- koja nezavisna institucija treba izvršiti kontrolu završnog godišnjeg računa.

3. prihvata:

- završni godišnji račun i izvještaj o radu.

4. usklađuje:

- rad i razvoj obrtničkih komora kantona.

5. imenuje i razrješava:

- predsjednika i potpredsjednike Komore,
- Upravni odbor, Nadzorni odbor i druga radna tijela Skupštine.

(2) Odluke donesene u skladu sa stavom (1) tačka 1. alineje 1., 3., 5. i 6., objavljuju se u Službenim novinama Federacije BiH.

Član 103. (Sastav Skupštine Komore)

(1) Skupština se sastoji od izabranih članova.

(2) Statutom se propisuje broj članova Skupštine i njihova raspodjela na obrtničke komore kantona. Pri raspodjeli se mora voditi računa o privrednim specifičnostima i privrednom značaju pojedinih djelatnosti, kao i o ravnopravnoj zastupljenosti kantona u odnosu na broj članova obrtničke komore kantona.

(3) Član 91. ovog zakona odgovarajuće se primjenjuje.

Član 104. (Predsjednik i potpredsjednici Komore)

(1) Komora ima predsjednika i dva potpredsjednika Skupštine i predsjednika i dva potpredsjednika Komore.

(2) Predsjednici i potpredsjednici iz stava (1) ovog člana biraju se iz reda različitih konstitutivnih naroda i te funkcije mogu obavljati u najviše 2 (dva) mandata.

(3) Predsjednik i potpredsjednici vrše svoje funkcije u međusobnoj koordinaciji.

(4) Predsjednik Komore predstavlja i zastupa Komoru.

Član 105. (Primjena odgovarajućih odredbi)

Na Obrtničku komoru Federacije BiH odredbe čl. 73. do 77. i člana 81. ovog zakona odgovarajuće se primjenjuju.

POGLAVLJE VI. – NADZOR

Član 106. (Upravni nadzor)

Upravni nadzor nad provođenjem ovog zakona i propisa donesenih na osnovu ovog zakona vrši Federalno ministarstvo razvoja, poduzetništva i obrta.

Član 107. (Inspekcijski nadzor)

- (1) Inspekcijske poslove u provedbi ovog zakona i propisa donesenih na osnovu ovog zakona vrše nadležne inspekcije.
- (2) Sva akta koja donesu, nadležne inspekcije dostavljaju i nadležnom organu, radi kontrole i utvrđivanja prestanka rada po sili zakona.

Član 108. (Obavljanje djelatnosti bez obrtnice, saglasnosti ili odobrenja)

- (1) Ako se obrt obavlja bez obrtnice ili bez saglasnosti za obavljanje posebnog obrta ili se srodna djelatnost obavlja bez odobrenja, odnosno ako se obrt obavlja suprotno obrtnici ili saglasnosti za obavljanje posebnog obrta ili se srodna djelatnost obavlja suprotno odobrenju, nadležna inspekcija će donijeti rješenje o zabrani obavljanja obrta ili srodne djelatnosti i zabranit će upotrebu uređaja i opreme kojima se obavlja obrt ili srodna djelatnost.
- (2) U slučajevima iz stava (1) ovog člana žalba protiv rješenja ne odgađa izvršenje rješenja.

Član 109. (Kontrola obavljanja posebnog obrta)

Pored ovlaštenja utvrđenih Zakonom o organizaciji organa uprave u Federaciji Bosne i Hercegovine federalni inspektor je nadležan da vrši kontrolu obavljanja posebnih obrta iz člana 6. stav (3) ovog zakona.

Član 110. (Neispunjavanje minimalnih uslova)

- (1) Ako prostor i oprema obrtnika ili lica koje obavlja srodnu djelatnost ne udovoljava propisanim uslovima, navedenim u izjavi iz stava (3) člana 14. ovog zakona, nadležna inspekcija donijet će rješenje kojim će odrediti rok, ne duži od 15 (petnaest) dana, do kojeg se nedostaci moraju otkloniti.
- (2) Ako se nedostaci iz stava (1) ovog člana ne otklone u određenom roku, nadležna inspekcija kaznit će prekršioca minimalnom kaznom iz člana 112. stav (1) ovog zakona i donijet će rješenje kojim će odrediti novi rok do kojeg se nedostaci moraju otkloniti.
- (3) Ako obrtnik ne ispoštuje rok iz stava (2) ovog člana, nadležna inspekcija donijet će rješenje o zabrani obavljanja određene djelatnosti, o zatvaranju prostora, odnosno o zabrani upotrebe uređaja i opreme.
- (4) U slučaju povrede sanitarno – zdravstvenih i tehničkih uslova zbog kojih mogu nastati teže posljedice po zdravlje i život ljudi, nadležna inspekcija donijet će rješenje kojim će odmah zabraniti obavljanje te djelatnosti dok se utvrđeni nedostaci ne otklone.
- (5) U slučaju iz st. (2) i (3) ovog člana žalba protiv rješenja ne odgađa izvršenje rješenja.

POGLAVLJE VII. – KAZNE NE ODREDBE

Član 111.

(Kršenje ravnopravnosti spolova)

(1) Ko na osnovu spola vrši nasilje, uznemiravanje i seksualno uznemiravanje opisano u članu 4. Zakona o ravnopravnosti spolova u Bosni i Hercegovini ("Službeni glasnik Bosne i Hercegovine", broj 16/03) kaznit će se za krivično djelo kaznom zatvora u trajanju 6 mjeseci do 5 godina.

(2) Novčanom kaznom od 1.000,00 KM do 15.000,00 KM kaznit će se za prekršaj pravno lice koje učini prekršaj kako je to predviđeno članom 28. Zakona o ravnopravnosti spolova u Bosni i Hercegovini.

Član 112.

(1) Novčanom kaznom od 500,00 KM do 1.000,00 KM kaznit će se za prekršaj imalac radnje – obrtnik ili lice koje obavlja srodnu djelatnost:

- a) ako obrt ili srodnu djelatnost obavlja sezonski u vremenu u kojem nije registrovan za sezonsko obavljanje djelatnosti (član 5. stav (2) ovog zakona),
- b) ako ne obavlja obrt ili srodnu djelatnost kao dopunsko zanimanje isključivo svojim radom (član 11. ovog zakona),
- c) ako obrtnik ne izloži veću obrtnicu u sjedištu obrta na vidnom mjestu (član 16. stav (7) ovog zakona),
- d) ako ne istakne firmu pod kojom će obrt ili srodna djelatnost posloovati (član 21. stav (6) ovog zakona),
- e) ako odobrenu djelatnost ne obavlja kvalitetno u skladu sa zakonima, propisima, dobrim poslovnim običajima i poslovnim moralom, (član 41. stav (1) tačka a) ovog zakona),
- f) ako na vidnom mjestu ne istakne cjenovnik svojih proizvoda, odnosno usluga na način dostupan kupcima odnosno korisnicima usluga i njih se ne pridržava (član 41. stav (1) tačka b) ovog zakona),
- g) ako na vidnom mjestu ne istakne radno vrijeme i njega se ne pridržava (član 41. stav (1) tačka c) ovog zakona),
- h) ako kupcu odnosno korisniku usluga ne izda račun o prodatoj robi odnosno izvršenim uslugama (član 41. stav (1) tačka d) ovog zakona),
- i) ako ne garantuje kvalitet proizvoda odnosno usluga i ne otkloni nedostatke ili ne nadoknadi pričinjenu štetu kupcu proizvoda, odnosno korisniku usluga u skladu sa važećim propisima i standardima (član 41. stav (1) tačka e) ovog zakona),
- j) ako ne vodi urednu evidenciju o obavljanju djelatnosti u skladu sa zakonom i drugim propisima koje donosi Federalno ministarstvo finansija, (član 41. stav (1) tačka f) ovog zakona),
- k) ako ne provodi propisane mjere zaštite na radu i zaštite životne sredine, koje se odnose na obavljanje registrovane djelatnosti (član 41. stav (1) tačka g) ovog zakona),
- l) ako u određenom roku ne otkloni nedostatke utvrđene od nadležne inspekcije koji se odnose na navode iz izjave iz stava (3) člana 14. ovog zakona (član 110. stav (2) ovog zakona).

(2) Novčanom kaznom od 500,00 KM do 1.000,00 KM kaznit će se za prekršaj imalac radnje – lice koje obavlja srodnu djelatnost: a) ako ne izloži odobrenje za rad u sjedištu srodne djelatnosti na vidnom mjestu (član 48. stav (3) ovog zakona).

(3) Za prekršaj iz stava (1) ovog člana kaznit će se uposlenik ili privremeni uposlenik novčanom kaznom od 50,00 KM do 200,00 KM (čl. 26. i 28. ovog zakona)

(4) Za prekršaj iz stava (1) ovog člana kaznit će se uposlenik novčanom kaznom od 50,00 KM do 200,00 KM (čl. 51. i 52. ovog zakona).

Član 113.

- (1) Novčanom kaznom od 500,00 KM do 1.500,00 KM, kaznit će se za prekršaje imalac radnje – obrtnik ili lice koje obavlja srodnu djelatnost:
- a) ako koristi rad drugih lica sa kojima nije zaključio ugovor o radu (član 2. stav (5) ovog zakona),
 - b) ako ne prijavi promjenu naziva i oznake obrta ili srodne djelatnosti (član 21. stav (5) ovog zakona),
 - c) ako ne prijavi promjenu sjedišta obrta ili srodne djelatnosti (član 22. st. (2) i (3) ovog zakona),
 - d) ako obavlja obrt koji nije obuhvaćen obrtnicom, odnosno za koji nije dobio saglasnost za obavljanje posebnog obrta (član 23. stav (1) ovog zakona),
 - e) ako obavlja obrt ili srodnu djelatnost u izdvojenom prostoru bez rješenja nadležnog organa (član 27. stav (1) ovog zakona),
 - f) ako vodi obrt ili srodnu djelatnost u dodatnom zanimanju bez uposlenika (član 28. stav (2) ovog zakona),
 - g) ako vodi vezani obrt ili srodnu djelatnost putem uposlenika bez rješenja nadležnog organa (član 28. stav (4) ovog zakona),
 - h) ako obavlja obrt ili srodnu djelatnost za vrijeme privremene obustave obavljanja obrta (član 44. stav (5) ovog zakona),
 - i) ako u predviđenom roku ne izvjesti nadležni organ o ponovnom početku obavljanja obrta ili srodne djelatnosti (član 44. stav (6) ovog zakona),
- (2) Novčanom kaznom od 500,00 KM do 1.500,00 KM, kaznit će se za prekršaje imalac radnje – lice koje obavlja srodnu djelatnost:
- a) ako obavlja srodnu djelatnost koja nije obuhvaćena odobrenjem (član 23. stav (1) ovog zakona),
- (3) Za ponovljene prekršaje iz stava (1) ovog člana obrtniku će izreći se zaštitna mjera zabrane obavljanja obrta u trajanju od tri do šest mjeseci.
- (4) Za ponovljene prekršaje iz st. (1) i (2) ovog člana licu koje obavlja srodnu djelatnost će izreći se zaštitna mjera zabrane obavljanja srodne djelatnosti u trajanju od tri do šest mjeseci.

Član 114.

- (1) Novčanom kaznom od 1.000,00 KM do 1.500,00 KM kaznit će se za prekršaj imalac radnje – obrtnik:
- a) ako obavlja obrt bez obrtnice, odnosno saglasnosti za obavljanje posebnog obrta (član 16. st. (1) i (2) ovog zakona).
- (2) Novčanom kaznom od 1.000,00 KM do 1.500,00 KM kaznit će se za prekršaj imalac radnje – lice koje obavlja srodnu djelatnost:
- a) ako obavlja srodnu djelatnost bez odobrenja, (član 48. stav (2) ovog zakona).
- (3) Za prekršaj iz st. (1) i (2) ovog člana izreći će se zaštitna mjera oduzimanja uređaja, proizvoda i opreme kojima je prekršaj izvršen, kao i nezakonito ostvarene dobiti.

POGLAVLJE VIII. – PRELAZNE I ZAVRŠNE ODREDBE

Član 115.

(Ovlaštenja za donošenje podzakonskih propisa)

Vlada Federacije BiH, federalni ministar razvoja, poduzetništva i obrta, kantonalni ministar nadležan za oblast obrazovanja, jedinice lokalne samouprave i Obrtnička komora Federacije BiH donijet će propise na osnovu ovlaštenja iz ovog zakona u roku od 6 (šest) mjeseci od dana stupanja na snagu ovog zakona.

Član 116.

(Usklađivanje poslovanja)

(1) Obrtnici, odnosno lica čija djelatnost spada u srodne djelatnosti, kojima je obavljanje djelatnosti odobreno po ranijim propisima, uskladit će poslovanje sa odredbama ovoga zakona u roku od 12 (dvanaest) mjeseci od donošenja propisa iz člana 115. ovog zakona.

(2) Obaveza iz stava (1) ovog člana odnosi se na obrtnike, odnosno lica čija djelatnost spada u srodne djelatnosti, kojima je obavljanje ovih djelatnosti odobreno prije stupanja na snagu ovog zakona, odnosno po ovom zakonu, a prije donošenja propisa iz člana 115. ovog zakona.

(3) Udruženja obrtnika, udruženja lica koja obavljaju srodne djelatnosti, opšta udruženja, obrtničke komore kantona i Obrtnička komora Federacije BiH uskladit će poslovanje sa odredbama ovoga zakona u roku od 12 (dvanaest) mjeseci od donošenja propisa iz člana 115. ovog zakona.

Član 117.

(Dozvola za nastavak poslovanja)

(1) Obrtnici i lica koja obavljaju srodne djelatnosti koji su po prijašnjim propisima osnovali radnju, mogu nastaviti s poslovanjem i ako vlasnik obrta ili srodne djelatnosti ne ispunjava uslove iz stava (1) člana 10. ovog zakona.

(2) Obrtnici i lica koja obavljaju srodne djelatnosti koji su po prijašnjim propisima osnovali radnju putem uposlenika mogu nastaviti s poslovanjem ako i dalje imaju uposlenika u skladu s odredbama ovog zakona.

Član 118.

(Priznavanje stručne spreme)

(1) Obrtnici i lica koja obavljaju srodne djelatnosti, koji su po prijašnjim propisima stekli odgovarajuću stručnu spremu mogu obavljati vezane obrte ili srodne djelatnosti utvrđene ovim zakonom, ako sa danom početka primjene ovoga zakona imaju osnovanu radnju.

(2) Obrtnicima koji su majstorski ispit položili po propisima koji su važili do dana početka primjene ovog zakona isti se priznaje u cijelosti.

Član 119.

(Prestanak obavljanja djelatnosti)

Postupci za odjavu obavljanja obrta i srodnih djelatnosti pokrenuti do dana početka primjene ovog zakona, rješavat će se prema odredbama ovog zakona.

Član 120.

(Prelazne odredbe)

(1) Do donošenja propisa na osnovu ovlaštenja iz ovog zakona primjenjivat će se propisi kojima su ta pitanja uređena, a koji su na snazi do donošenja novih propisa.

(2) Postupci pokrenuti na osnovu zahtjeva iz oblasti obrta koji su podneseni prije stupanja na snagu ovog zakona, rješavat će se prema propisima koji su bili na snazi u vrijeme podnošenja zahtjeva samo ako su povoljniji za podnosioca zahtjeva.

Član 121.

(Prestanak važećeg Zakona)

Stupanjem na snagu ovog zakona prestaje da važi Zakon o obrtu ("Službene novine Federacije BiH", 52/02, 29/03 i 11/05).

Član 122.

(Stupanje na snagu Zakona)

Ovaj Zakon stupa na snagu osmog dana od dana objavljivanja u "Službenim novinama Federacije BiH".